

*Item*, in questa matina si levò una compagnia di zoveni, di anni 18 in zerecha, richissimi, nominali Inmortalli, numero 13, computà uno è fuora. Hanno fato uno prior per uno anno; et dieno far subito una festa, prima il prior, poi i altri tutti, sotto pena *etc.*; et non poleno acetar niun, si prima non è compite tutte le feste. Veneno vestiti di veludo paonazo, di varo; à manege a comedo, calze una rossa l'altra meza paonaza e beretina. El signor, di alto basso cremesin; à manege averte, fodrà di armelini, e bareta di veludo negro a la franzosa in testa, con una zoja suso. Questi uditeno messa a la Madona di Miracoli, poi veneno a San Marco *videlicet*:

Sier Lunardo Contarini, di sier Hironimo da Londra, prior,

Sier ..... Contarini, *quondam* sier Alvise, da Londra,

Sier Marco Contarini, di sier Zacharia, el cavalier,

Sier Andrea Diedo, *quondam* sier Antonio,

Sier Pollo Vendramim, di sier Antonio,

Sier ..... Dandolo, di sier Alvixe,

Sier ..... Malipiero, *quondam* sier Hironimo,

Sier Zuam da Leze, di sier Michiel,

Sier ..... Grimani, *quondam* sier Alvise,

Sier Agustin Moro, *quondam* sier Baldissera,

Sier Alvise Foscari, di sier Francesco, el cavalier,

Sier .....  
Sier Almorò di Prioli, *quondam* sier Bernardo, è

fuora.

Et nota, si chiamano Inmortalli. Sono 3 compagnie di tal nome, soto altri vocabuli: *videlicet* Sempreviva, Perpetui, Eterni, et hora questi Inmortalli. Nota, altre compagnie a li mie' di sono: *videlicet* Puavoli, Felici, Principali, Sempreviva, Libardi, Shragazai, Fraternali, Potenti.

*A dì 25.* Fo consejo di X con zonta. Et preseno certa parte, di far provision a li castelani di Corfù, come dirò di sotto.

*A dì 26.* Fo pregadi. Et fo preso do gratie di sier Hironimo Gradenigo, *quondam* sier Pasqual, et di sier Marin Gradenigo, debitori *etc.*

*Di Roma.* Come era stà expedi, a dì ..., in concistorio el patriarcha' di Constantinopoli, che 'l cardinal Corner renonciò, a petizion di la Signoria, al cardinal Ystrigonia è in Hongaria. *Item*, quel di Padoa dato al Dandolo, vescovo di Vicenza; quel di Cremona al Trivixan; et quel di Vicenza a San Piero in Vincula, nepote dil papa. *Item*, che 'l cardinal San Vidal ense di castelo, e dà al papa ducati 20 mi-

lia. *Item*, l' orator non havia dito 0 ancora al papa di l' abatia di Ceredo, che per pregadi era stà data al cardinal Corner.

*Di Trani, di sier Alvise d' Armer, governador.* Dil zonzer li dil cardinal Hadriano, fuzito di Roma; et vene incognito, poi à mandato per la sua fameja. El governador l' andò a visitar; disse era partito di Roma per fuzer l' ira di papà Julio; et *alia, ut in litteris*. El qual cardinal scrisse a la Signoria di soa mano una dolce letera, pregandola volesse darli salvo conduto, perchè vol star in le terre di la Signoria, come bon servitor di questo stato.

*Di Elemagna, di Alla, di 20.* Il re va a Yspurch. In ciera, le cosse si sferdisse; non verà per non aver danari. Il cardinal Santa †, legato, è li, et il signor Constantm Arniti, ma con pocha reputation. *Et cætera secretiora, ut in litteris.*

*Da Liom, di l' orator.* Come il re è a Bles. E il cardinal Roan, legato, va a trovar soa majestà, con il qual va esso orator; tuta via fa provision grande. E le cosse di Geler prospera contra elemani o ver fiandresi, mediante il favor li à mandato il re di Franza.

*Da Milam fo etiam letere.* Li revelini si fabricha *etc.*

Fu posto per li savij, tutti quelli hanno casteli, porte *etc.* in le terre nostre, vadino a star *sub poena privationis*; exceptuando quelli *ad tempus* vanno con rectori fuora, con licentia di la Signoria. Fu presa.

Fu posto, per li savij, certa parte di debitori a le raxon nove, di gratie, *ut in ea*; et (*quelli*) non hanno pagà le rate, siano privi di le gratie, *ut in parte*. Fu presa. Et cussi di altri officij.

Fu posto, per li 5 savij sora la reformatiop di le decime, sier Francesco Trun, sier Marco da Molin, sier Anzolo Trivixan, sier Alvise Arimondo et sier Zorzi Emo, una parte che si rifazi li chatastichi, dando termine, *ut in parte*, a quelli dieno dar le so condition in nota; con questo, si fazi di X anni in X anni, et miorando in li X anni, non sieno acresudi 0, *ut in parte*. Et li savij messeno che i pagasseno *etc.* Fo disputation: parlò sier Zorzi Emo e ben; et li parlò contra, e non fo aldito, sier Tadio Contarini, savio a terra ferma. Et andò 3 volte le parte; *tandem* di 4 ballote fu presa quella di 5 provedadori preditti, *ut patet*.

*A dì 27.* Fo consejo di X con zonta. Et feno li soi capi.

*A dì 28.* Fo gran consejo. Et fo leto una provision, presa nel consejo di X, a dì 25, con la zonta,